



Sjuandeklassingane måtte kle på seg inne og ty inn i det varmare biblioteket for nokre veke sidan

Skulen i Uskedalen ivaretar ikkje med dagens standard elevane og dei tilsette sitt fysiske arbeidsmiljø, påpeikar FAU ved skulen. Dermed driv bygdas skule i strid med lova som slår fast at arbeidsmiljøet i verksemda skal vera fullt forsvarleg utfra ein enkeltvis og samla vurdering av faktorar i arbeidsmiljøet som kan innverka på arbeidstakarane sin fysiske og psykiske helse og velferd.

Det heiter vidare i lova at standarden for sikkerheit, helse og arbeidsmiljø til einkvar tid skal utviklast og forbetrast i samsvar med utviklinga i samfunnet.

Det blir også streka under at fysiske arbeidsmiljøfaktorar som bygnings- og utstyrmessie tilhøve, inneklimate, lydtilhøve, støy, stråling og linande skal vera fullt forsvarleg utifra omsynet til arbeidstakarane helse, miljø, sikkerheit og velferd. FAU viser også til opplæringslova som seier at alle elevar i grunnskular og vidaregåande skular har rett til eit godt fysisk og psykososialt miljø som fremjar helse, trivsel og læring.

FAU ved Haldis Amalie Åkra og Hildegund Hansen viser i brevet til rådmann med gjenpart til ordføraren og andre ansvarlege til at elevar og dei tilsette i fleire høve har opplevd å koma til arbeidsrom med temperatur langt under anbefalte 19 grader, Arbeidsmiljøloven eller forskrifter inneheld ingen faste temperaturgrenser men anbefalar at det ikkje går under 19.

Situasjonen toppa seg nå i januar og det blir ekstra ille når det bles. Vinden går tvers igjennom den gamle og ikkje isolerte delen av skulen. På grunn av dei låge temperaturane må elevane sitja inne med ytterkle og det er ueheldig når dei skal ut til friminutt med dei same klea. Den låge temperaturen går også ut over undervisninga som blir amputert når elevane sit og frys og ikkje klarer å konsentrera seg. Dei blir meir fokusert på kor kaldt det er enn på det dei skal læra.

Inneklimaet er heller ikkje bra om våren og sommaren når sola står på. Då er det dårleg ventilasjon og lufting.

FAU minnar om dei 15 millionar som ligg i økonomiplanen og med 5 millionar i år. og 10 millionar neste år. FAU er bekymra for at renoveringa atter igjen kan bli utsett med den økonomiske stoda kommunen er inne i, FAU krev at dei ansvarlege tek det ansvaret dei har for at inneklimaet blir forbetra snarast

Tekst og foto: Ola Matti Mathisen